

Siunnersuummut oqaaseqaatit

Oqaaseqaatit nalinginnaasut

1. Aallarniut

1.1. Siunnersuummut pingaarnertut tunuliaqutaasut

GUX-imi Timersornermik sammiveqarluni ilinniarneq misileraatigineqarnikuvoq, misileraanerulli kingorna ukiumi atuarfiusumit 2021-2022 atuutilersinneqarsimasumik.

Timersornermik sammiveqarluni ilinniartitsinermi inuusuttut ilinniaatigaluni qaffassisumik timersorinnaanissaanik taamaasillunilu atuagarsornikkut timersornikkut piginnaanngorsarnissamik periarfissaqarsinnaanissaa siunertarineqarpoq. Timersornermik sammiveqarluni ilinniarneq ilinniarnertuunngorniarfiup sivilissusaanniit nalinginnaasumit ukiumi pingasuni ingerlanneqartumit ukiumik ataatsimik ilallugu ukiumi sisamani sivilissusilerlugu ingerlanneqarpoq. Timersornermik sammiveqarluni ilinniarneq GUX-Nuummi neqeroortigineqarpoq.

GUX-Nuummi timersornermik sammiveqarluni ilinniarnermut qinnuteqartunik akuersisarnermut malittarisassanik suliaqarnikuvoq. Qinnuteqartut ilinniarnertuunngorniarfinni allatulli piumasaqaatit malillugit akuerineqarnissaminnik naammassinnissapput. Tamatuma kingorna qinnuteqartut GUX-Nuup nittartagaanni aamma Elite Sport Greenlandip nittartagaanni piumasaqaatit allassimasut malillugit toqqarneqartarput.

GUX-Nuup nittartagaanni ersippoq timersornermik sammivilimmik qinnuteqartoq ilinniarnermut qinnuteqaasiornermini tunngavilersuummik allagaqarnissaanik piumasaqaateqartoq. Tamatuma saniatigut qinnuteqartup sungiusaasuata timersortartut allaatiginninnera, angusimasaanik siunissaalu pillugit oqaaseqaammik ilanngussissaaq. Aatsaat tamatuma kingorna qinnuteqarsimasut nalilersorneqassapput timersornermillu sammiveqarluni ilinniarnissamat toqqaasoqassalluni. Qinnuteqartut timersornermik sammivilimmik ilinniarnissamat akuerisaanngitsut allamik sammiveqarlutik ilinniarnissaannik neqeroortigineqassapput.

2023-p ingerlanerani Naalakkersuisoqarfik suliaqarfimmiittoq GUX-imi Timersornermik sammivilimmik ilinniarnermut qinnuteqarsimasumik timersornikkut piginnaasai aallaavigalugit itigartinneqarsimasumit naammagittaalliummik suliaqarpoq. Naalakkersuisoqarfiup susasaqartup naammagittaalliummik suliaqarnermini erseqqissaatigaa GUX-imi Timersornermik sammiveqarluni ilinniarnermi akueritinnissamat piumasaqaatit tapiliunneqartut aalajangersimasuusariaqarnerat tamannalu pillugu tunngavilersuutaasinnaasunik erseqqissunik pilersitsisoqartariaqartoq.

Taamaattumik siunnersuuteqarnermi timersornermik sammiveqarluni ilinniarnissamut akuerineqarnissamut piumasaqaatit tapiliussat aalajangersimasuutillugit tunngavilersuutigineqarsinnaalernissaat siunissamilu ilinniarnernik allanik ukiuni pingasunit sivilunerusumik pilersitsisoqassappat piumasaqaatinik tapiliussaqaartitsinissamut pisariaqaartitsisoqarsinnaammat.

Tamatuma saniatigut ukiuni sisamani sivilussusilimmik ilinniarnerni ukiut sisamassa 4. G- imik taagorneqarnissaa, semesterillu kingulliit marluk 7. aamma 8. semesterinik taagorneqarnissaa inatsisitigut tunngavilerneqarnissaa naleqqussorineqarpoq.

2. Siunnersuummi immikkoortut pingaarnertit

a) Inatsisit atuuttut

Inatsisit atuuttut tassaapput Ilinniarnertuunngorniartarneq pillugu Inatsisartut inatsisaat nr. 13, 22. november 2011-meersoq, Ilinniarnertuunngorniartarneq pillugu Inatsisartut inatsisaata allanngortinnera pillugu Inatsisartut inatsisaat nr. 4, 30. maj 2014-imeersoq aamma Inatsisartut inatsisaat nr. 31, 9. december 2015-imeersoq aamma Inatsisartut inatsisaat nr. 16, 27. november 2020-meersoq (Ilinniarnertuunngorniartarneq pillugu inatsit). Inatsit pingaarneq allannguutaasut ilanngullugit ataatsimoortunngortillugit allanneqarput Ilinniarnertuunngorniartarneq pillugu Inatsisartut inatsisaat pillugu Namminersorlutik Oqartussat nalunaarutaat nr. 10, 29. september 2021-imeersumi.

Ilinniarnertuunngorniartarneq pillugu inatsimmi § 8, imm. 1-mi takuneqarsinnaavoq, qinnuteqartoq meeqqat atuarfianni aalajangersimasumik qulequtsiilluni suliasami, 10. klassimi soraarummeernermi angusani tamani, inaarutaasumik angusimasani kiisalu inaarutaasumik pinngitsoorani misilitsiffiusuni tamani minnerpaamik E-mik karaktereqarpat GUX-imi atualernissamut akuerineqarsinnaavoq. Rektori § 8, imm. 1-imi piumasaqaatinik sanioqqutsitsinissamut akuersisinnaavoq, qinnuteqartup karakterit ikittunnguit ilaanni E angusimanngippagit, qinnuteqartullu ataatsimut pisinnaasai ilinniarnertuunngorniartarluni naammassinnaanut naammattutut rektorimit nalilerneqarpat. Qinnuteqartut § 8, imm. 1-imi piumasaqaatinut naammassinnittut ilinniarnissaminnut inatsisitigut akuerineqartussaapput.

§ 9-mi allaqqavoq, qinnuteqartut inatsisitigut piumasaqaatit naapertorlugit ilinnialersinnaanngitsut, ilinniarnertuunngorniartarfinit ilinniartutut akuerisaanissamut maleruagassat malillugit misilitsereernermi akuerineqarsinnaasut. Qinnuteqartut misilitsinnerminni angusisimasut piumasaqaatit naapertorlugit akuerisaasimannngitsut ilinniarnertuunngorniartarluni ilinniartunngornissaq piumasarisinnaanngilaat ilinniarnertuunngorniartarfimmili inissaqarunik ilinnialersinnaapput.

Ilinniarnertuunngorniartarfimmi ilinnialersussat tamarmik semesteri siullesq naammassissavaat, tamanna qinnuteqartunut tamanut atuuppoq, tamatuma kingorna kissaatit malillugit ilinniakkatigut sammivimmik qinersisoqarsinnaavoq, takuuk § 15, imm. 1.

Ilinniarnertuunngorniarneq pillugu inatsimmi ilinniakkatigut sammivimmik akuerisaanissamut ilassutitut piumasaqaateqanngilaq. Ilinniarnertuunngorniarneq pillugu inatsimmi aamma ilassutitut piumasaqaatinut inatsisinik tunngavissiisnaasunik aalajangersagaqanngilaq.

Ilinniarnertuunngorniartarneq pillugu inatsimmi, ukiup sisamassaa ilinniarnertuunngorniartarneq taamatullu ukiup sisamassaani semesterit taaguuteqartinneqanngillat.

b) Siunnersuut

Sammivimmik qinikkanik ukiuni pingasunit amerlanerusunit ilinnialernissamut ilassutitut piumasaqaatinik Naalakkersuisut aalajangiinissaannut siunnersuut ilaatigut tunngavissiisaaq. Tamanna timersornermik sammiveqarluni ilinniarnertuunngorniarnermut attuumassuteqassaaq. Timersornermik sammiveqarluni ilinniarnertuunngorniarneq ukiuni sisamani sivilissuseqarpoq, ilinniarnertuunngorniarneluni ilinniarnermi inatsisit atuuttut sukkulluunniit aqqissuunneqartumik eqquuteqqullugit, tassunga ilanngullugit §§ 8-9 malillugu ilinniagaqarnissamut akuerisaanissamut piumasaqaatinut tunngasut naammassineqassapput. Timersornermik sammiveqarluni ilinniarnertuunngorniarneq ilinniartussanut qaffasissumik timersortartunut imaluunniit qaffasissumik inissimasinnaasumik piukkunnaateqartunut tulluarsagaavoq, taamaammallu taamatut ilinniarnertuunngorniartarnermut ilassutitut piumasaqaatinik aalajangersaanissaq pisariaqarpoq. Assinganik ilinniakkatigut sammiviit allat, ilassutitut piumasaqaatinik ilinniarnertuunngorniarnarfimmut ilinnialernissamut piumasaqaatit §§ 8-9-meersut saniatigut immikkut pisariaqartitsinerat naammassiniarlugu.

Timersornermik sammiveqarluni ukiuni pingasunit sivilissunerusumik ilinniarnertuunngorniarnissamut allatulluunniit sammiveqarluni ilinniarnertuunngorniarnissamut neqeroorutinut naliliivigineqarnissamut ilassutitut piumasaqaatinik inatsisitigut pilersitsinissamut, tassunga ilassutitut piumasaqaatit suut atuutinneqassanersut Naalakkersuisunit aalajangerneqassapput.

Ilinniartup 1. G imaluunniit 2. G naammassereerlugit rektori isumaqatigiissuteqarfigneratigut ukiut marluk angullugit ilinniakkaminik unitsitsigallartup, 2. G-p imaluunniit 3. G-p aallartinnerani ilinniarnertuunngorniarnini ilinniarnertuunngorniarnarfimmi ilinniartup ilinniarfigeriigaani imaluunniit ilinniarnertuunngorniarnarfimmi allami nangissinnaavaa. Assinganik siunnersuutigineqarpoq 4. G-p aallartinnerani ilinniarnertuunngorniarneq ilinniarnertuunngorniarnarfimmi ilinniartup ilinniarfigeriigaani imaluunniit ilinniarnertuunngorniarnarfimmi allami nanginneqarsinnaasoq.

Aammattaaq § 15 allanngortinneqassasoq siunnersuutigineqarpoq, semesterinut arfineq-pingasunut naleqqussaanermik, timersornermik sammiveqarluni ukiuni sisamani

ilinniarnertuunngorniartunut, ukiuni pingasuni nalinginnaasumik GUX-mi ilinniarnertuunngorniartuniit.

Kiisalu nutaatut § 53, imm. 2-mi rektorip ilinniartumik 3. G-miit 4. G-mut ingerlaqqinnissaanik itigartitsissuteqarsinnaananeramik siunnersuutigineqarpoq.

3. Pisortanut aningaasaqarnikkut allaffissornikkullu kingunerisassat

Siunnersuut aningaasarsiornikkut allaffissornikkulluunniit pisortanut sunniuteqartussatut nalilerneqanngilaq.

4. Inuussutissarsiortunut aningaasaqarnikkut allaffissornikkullu kingunerisassai

Siunnersuut aningaasaqarnikkut imaluunniit allaffissornikkut inuussutissarsiortunut sunniuteqassangatinneqanngilaq.

5. Avatangiisinut, pinngortitamut inuillu peqqissusaannut sunniutaasussat

Siunnersuut avatangiisinut, pinngortitamut innuttaasulluunniit peqqissusaannut kinguneqartussatut naatsorsuutigineqanngilaq.

6. Innuttaasunut kingunerisassai

GUX-mi timersornermik sammiveqarluni ilinniarnertuunngorniarnissamat qinnuteqartunik aalajangiisoqaleraangat ammanerusumik pissuseqarnissamik innuttaasut naatsorsuuteqarsinnaapput. Assinganik ukiuni pingasunit sivisunerusumik ilinniarnertuunngorniarnissamat allatulluunniit sammiveqartunut, ilinniarnertuunngorniarnissamat qinnuteqarnissamat piumasqaatinut ilassutitut malittarisassanik aalajangersaasoqassatillugu atuutissaaq. Piginnaatitsineq pillugu aalajangersagaq Naalakkersuisunit atornerqarpat, qinnuteqartartut isumannaatsuunerat qulakkeerneqassaaq.

7. Kingunerisassat pingaarnerit allat

Siunnersuut allanik malunnaatilinnik sunniuteqarnavianngitsoq nalilerneqarpoq.

8. Pisortanik aamma kattuffinnik il.il. tusarniaaneq

Siunnersuut piffissami 18. juni-miit 16. juli 2024-imi tusarniaanernut isaaffikkut pissarsiarineqarsinnaasimavoq, tusarniaanermullu peqataasunut nassiunneqarsimalluni, takuuk ilanngussa 2.

Aalajangersakkanut ataasiakkaanut oqaaseqaatit

§ 1-imut

Nr. 1-imut

Ukiut 3-t sinnerlugit sivilissusilimmik ilinniarfigerusutamut akuerisaanissamut ilassutitut piunasaqaatinut malittarisassiornissamut aalajangersagaq tunngavissiivoq. Piunasaqaatit arlallit eqquutsinneqarsimasussaapput, tunngavigitat ilinnialernissamut §§ 8-9-p saniatigut piunasaqaatinit pisariaqartitsisoqarpat, ilinniakkatigut sammivimmik atuuttumik malinnaasinnaasoqassappat.

Timersornermik sammiveqarluni ilinniarnertuunngorniartarneq pillugu tunngaviusumik aalajangersagaq timersornermik sammivilimmik ilinniarnertuunngorniarnermi piunasaqaatinut ilassuteqarsinnaanissamik immikkut ittumik nalunaarusiornikkut aalajangerneqartussamik siunertaqarpoq. Tapertaliussamik piunasaqaatit qinnuteqartup timersornikkut piginnaasaanut attuumassuteqartariaqassapput, assersuutigalugu timersoqatigiiffiup sungiusaasuaniit oqaaseqaatit, timersornermut piffissaq isumalluutillu qanoq amerlatigisut atornerqarnersut il.il.

Assinganik tapertaliussamik ilinniakkatigut sammivinnut allanut piunasaqaatit allat ilinniakkamut pineqartumut aamma tunngassaaq.

Nr. 2-mut

Timersornermik sammiveqarluni ukiuni sisamani ilinniarnertuunngorniartoqartalernerup ingerlatsissutigineqalerneranut aalajangersagaq iluarsiiineruvoq. Ilinniartup 3. G naammassereerlugu ilinniarnertuunngorniarnissamik sammivimmik ukiuni 4-ni sivilissusilimmi, rektori isumaqatigineratigut ukiut marluk angullugit ilinniakkaminik unitsitsigallartup, 4. G-p aallartinnerani ilinniarnertuunngorniarnini nangissinnaassavaa, ilinniarnertuunngorniarnissamik ilinniartup ilinniarfigeriigaani imaluunniit ilinniarnertuunngorniarnissamik allami. Assinganik ilinniartup 1. G imaluunniit 2. G naammassereerlugit rektori isumaqatigiissuteqarfigineratigut ukiut marluk angullugit ilinniakkaminik unitsitsigallartup ilinniarnini nangissinnaavaa.

Nr. 3-mut

Ilinniarnermi sammiviit pineqartuni aalajangersakkami erseqqissarneqarpoq, ukiuni sisamani sivilissusilinni, ukioq ilinniarfiusoq kingulleq 4. G-mik taaneqartoq, tassaasoq ilinniarnermi 7.-8. semesteri. Ilinniarnermi sammiviit ukiuni pingasuni sivilissusillit allat neqeroorutaasut, maannakkutut 2.-6. semesterinik taaneqarput.

Nr. 4-mut

Ilinniartoq ukiuni pingasunit sivilissusumik ilinniagaqarpat, tamakkiisumillu pissarsiaqartumik ilinniakkaminik aallussisimangippat, ilinniartoq 3. G-miit 4. G-mut

ingerlariaqqinnissaanut rektorimit aammattaaq itigartitsissutigineqarsinnaavoq, soorlu nalinginnaasumik ilinniarnertuunngorniarluni ilinniartitaanermi tamanna atuuttoq, takuuk imm. 1.

§ 2-mut

Inatsisartut inatsisaata piffissaalluartillugu atuutilernissaa siunertaralugu Inatsisartut inatsisaat ulloq 1. januar 2025-mi atulersinneqassasoq siunnersuutigineqarpoq, ilinniarnertuunngorniarnissamut qinnuteqarfissap killerititaata tullia tikitsinnagu, Timersornermik sammiveqartumik ilinniartitaanermi piomasaaqatit tapertaliussanut ersarissumik inatsisitigut tunngavissaqarnissamut aalajangersaasoqaqqullugu.

Siunnersuut inatsimmut atuuttumut sanilliullugu	
<i>Oqaasertaliunneqartut atuuttut</i>	<i>Siunnersuut</i>
	§ 1 Ilinniarnertuunngorniartarneq pillugu Inatsisartut inatsisaat, Inatsisartut inatsisaat pillugu Namminersorlutik Oqartussat nalunaarutaat nr. 10, 29. september 2021-meersoq naapertorlugu uku allanngortinneqarput:
	1. § 9-p kingorna ilanngunneqassaaq. ” § 9 a. Ukiut 3-t sinnerlugit sivisussusilimmik ilinniarfigerusutamut akuerisaanissamut piumasaaqatit ilassutitut piumasaaqatit §§ 8-mi 9-milu taaneqartut sanitigut ilassutitut piumasaaqatissat pillugit Naalakkersuisut malittarisassaliorsinnaapput.”
§ 10, imm. 2: <i>Imm. 2.</i> Ilinniartup 1. G imaluunniit 2. G naammassereerlugit rektori isumaqatigiissuteqarfigineratigut ilinniakkaminik ukiut marluk angullugit unitsitsigallartup, 2. G-p imaluunniit 3 G-p aallartinnerani ilinniarnertuunngorniarnini nangissinnaavaa ilinniarnertuunngorniarmimmi ilinniartup ilinniarfigeriigaani imaluunniit ilinniarnertuunngorniarmimmi allami.	2. § 10, imm. 2-mi, oqaaseqatigiit aappaattut ilanngunneqassaaq: ” Ilinniartoq 3. G naammassereerlugu ilinniarnertuunngorniarmimmi sammivimmik ukiuni 4-ni sivisussusilimmi, rektorilu isumaqatigiinneq malillugu ukiut 2-t angullugit ilinniakkaminik unitsitsigallartup, 4. G-p aallartinnerani ilinniarnertuunngorniarnini nangissinnaavaa ilinniarnertuunngorniarmimmi ilinniartup ilinniarfigeriigaani imaluunniit ilinniarnertuunngorniarmimmi allami.”
§ 15 imm. 1-3: § 15. Ilinniagaq aaqqissugaanera ilinniartunut tamanit ataatsimoorunneqartutut 1. semesterimi tunngaviusumik ilinniarfiussaaq, tamatumalu kingorna ilinniarnermi immikkut sammiveqarluni, ilinniartunit ataasiakkaanit toqqarneqartumik ilinniarnertuunngorniarmimmi pilersitaasa akornannit neqeroorutaapput,	3. § 15, imm. 1-3, imatut oqaasertalerneqassapput: ” Ilinniagaq 1. semesterisut aaqqissugaassaaq, ilinniartunit tamanit ataatsimoorunneqartutut, tamatumalu kingorna ilinniarnermi immikkut sammiveqarluni ingerlatsinertut, ilinniartunit ataasiakkaanit ingerlatsinernit ilinniarnertuunngorniarmimmi

<p>tak. § 29. Tunngaviusumik ilinniagaqarneq 2. semesterimiit 6. semesterimut ingerlanneqartarpoq.</p> <p><i>Imm. 2.</i> Semesterit 1, 3 aamma 5 ukiup ilinniarfiusup aallartinneraniit 31. decemberimut ingerlasarput. Semesterit 2, 4 aamma 6 1. januarimiit ukiup ilinniarfiusup naaneranut ingerlasarput.</p> <p><i>Imm. 3.</i> Semesterit 1-2 taaneqarput 1. G, semesterit 3-4 taaneqarput 2. G aamma semesterit 5-6 taaneqarput 3. G.</p>	<p>neqeroorutigalugillu pilersitaasa akornannit toqqarneqartumik, tak. § 29.</p> <p>Sammivilimmik ilinniagaqarneq 2.-6. semesterini ingerlanneqartarpoq. Ukiuni 4-ni sammivilimmik ilinniagaqarneq 2.-8. semesterini ingerlanneqartarpoq.</p> <p><i>Imm. 2.</i> Semesterit 1, 3, 5 aamma 7 ukiup ilinniarfiusup aallartinneraniit 31. decemberimut ingerlasarput. Semesterit 2, 4, 6 aamma 8 1. januarimiit ukiup ilinniarfiusup naaneranut ingerlasarput.</p> <p><i>Imm. 3.</i> 1.-2. semesterit 1. G-mik taaneqartarput, 3.-4. semesterit 2. G-mik taaneqartarput, 5.-6. semesterit 3. G-mik taaneqartarput, aamma 7.-8. semesterit 4. G-mik taaneqartarlutik.”</p>
<p>§ 53. Rektorip ilinniartup 1.G-miit 2.G-mut imaluunniit 2.G-miit 3.G-mut nuunnissaa itigartitsissutigisinnaavaa, ilinniartuq ataatsimut isigalugu ilinniartitsinermik ingerlanneqareersumik naammaginaratumik pissarsisimanngitsoq nalilerneqarpat. Tamatumani pisariaqarpoq, kisiannili klassimut tullermut nuunnissamik itigartitsinermut kisimi peqqutaasinnaanani, ilinniartup angusanut tunngatillugu semesterimi imaluunniit killiffimmini karakteriisa angusinissamut killigititaasunit appasinnerunissaat.</p> <p><i>Stk. 2.</i> Naalackersuisut rektorip ilinniartup klassimut qaffasinnerusumut nuunnissaanik itigartitsisinnaanera pillugu malittarisassanik erseqqinnerusunik aalajangersaasinnaapput, tamatumunnga ilanngullugu ilinniartup ilinniartinneqaqqinnissanik sunik neqeroorfigineqassanersoq.</p>	<p>4. § 53 imm. 1-p kingorna immikkoortut nutaatut ilanngunneqassaaq:</p> <p>” <i>Imm. 2.</i> Ukiut 3-t sinnerlugit sammivilimmik ilinniagaqartut eqqarsaatigalugit ilinniartup 3. G-miit 4. G-mut ikaarsaariarnissaa rektorip aammattaaq itigartitsissutigisinnaavaa, tak. imm. 1.”</p> <p><i>Imm. 2</i> tamatuma kingorna imm. 3-nngussaaq.</p>
	<p style="text-align: center;">§ 2</p> <p>Inatsisartut inatsisaat ulloq 1. januar 2025 atuutilissaaq.</p>

Tusarniaanermut akissutitut atatillugu allakkiaq

Siunnersuut tusarniaavigisartakkanut ukununga ulluni 18. juni-miit 16. juli-mut 2024-mi tusarniaassutigineqarpoq:

GUX Aasiaat
KTI GUX Sisimiut
GUX Nuuk
GUX Qaqortoq
Elite Sport Greenland
Avannaata Kommunia
Kommune Qeqertalik
Qeqqata Kommunia
Kommuneqarfik Sermersooq
Kommune Kujalleq
KANUNUPE
Ilisimatusarfik
PI/SPS
Aqqut
Sulisitsisut/Grønlands Erhverv
NUSUKA
Nunatta Meeqqat Pisinnaatitaaffiit Sullissivia (MIO)
Tilioq
Utoqqaat Oqaaseqartartuat
Inuit Pisinnaatitaaffii Pillugit Siunnersuisoqatigiit

Taakku saniatigut siunnersuut Naalakkersuisut tusarniaassutigisaminnut nittartagaanni piffissami tassani pissarsiarineqarsinnaasimavoq.

Tusarniaanermut piffissaliussap naanerani tusarniaanermut akissutit ukunangaanniit tiguneqarsimapput:
Sulisitsisut/Grønlands Erhverv, Tilioq, Qeqqata Kommunia aamma Kommune Qeqertalik.

Sulisitsisut/Grønlands Erhverv aamma Tilioq siunnersuummut oqaaseqaateqanngillat.

Qeqqata Kommunia siunnersuummut tapersiivoq.

Kommune Qeqertalik § 10, imm. 2, oqaaseqatigiit aappaattut siunnersuutigineqartumut oqaasertaliussaq, ukiuni 4-ni sammiveqartuni ilinniartut 1. G imaluunniit 2. G naammassereerlugu ukiut 2-t angullugit ilinniakkaminnik unitsitsigallartut ilinniarnertuunngorniarfimmilu ilinniarnerminnik ingerlatitseqqissinnaanngitsut

oqaaseqarfigivaa. Siunnersuut ukiuni 4-ni sammiveqartuni ilinniartunut periarfissaasunut sinaakkutissiissaaq, ukiuni 3 imaluunniit 2-ni sivilutigit sumik sammivilinnik ilinniartut assigalugitanik. Kommune Qeqertalik isumaqarpoq oqaasertaliussatut siunnersuutigineqartoq pisariaqanngitsumik nassuiaasorsorneqarsinnaasoq.

Tamanna pillugu oqaatigineqassaaq, ukiuni 4-ni ilinniarfusuni ilinniartut rektori tamanna pillugu isumaqatigereerneratigut 4. G taamaallaat ilinniarnerminnik ingerlatseqqinnissaanut periarfissaqaannaratik aammattaarli 2. G imaluunniit 3. G ingerlateqqissinnaamassuk ilinniarnertuunngorniarfimmilinniarfigileriikkaminni ilinniarnertuunngorniarfimmiluunniit allami. Aalajangersakkatut siunnersuut aalajangersakkamut atuutereersumut ilassutaavoq, taamaalilluni ukiut 3-it sinnerlugit sivilussusilimmik ilinniartut ukiuni 2-ni imaluunniit 3-ni ilinniarnertuunngorniarlutik ilinniartut assigalugit ilinniarnertuunngorniarlutik ingerlatitseqqinnissamut periarfissaqassammata.

Siunnersuummi § 53, imm. 2-mut tunngatillugu Kommune Qeqertalik siunnersuut imm. 1-mut ilanngullugu allanneqarsinnaasoq oqaaseqarpoq. Kommune Qeqertalik aammattaq isumaqarpoq toqqaasoqarnissaa napertuutissasoq inatsisitigut oqaasertaliussami ilinniarnermi sammiviit ukiut 4-t sinnerlugit sivilussusillit ilanngunneqassanersut imaluunniit ilinniakkamik sammiviit ukiuni 4-ni sivilussusillit taamaallaat ilanngunneqassanersut.

Tamanna pillugu oqaatigineqassaaq, imm. 2-p ilanngunneqarneranut tunuliaqutaasoq tassaammat, nalinginnaasumik ukiuni 3-ni ilinniarnertuunngorniarluni ilinniarnermut tapiliussatut isigineqassammata. Siunnersuut periarfissiissaaq ilinniakkamik sammiviit ukiuni 3-nit sivilunerusumik ingerlanneqarsinnaanerata, maannali Timersornermik sammivilik ukiuni 4-ni sivilussusilik taamaallaat pilersinneqarnikuuvoq. Kingusinnerusukkut ilinniakkamik sammivik ukiut 4-t qaangerlugit sivilussusilik pilersinneqassappat, aalajangersakkap naleqqussarneqarnissaa pisariaqarnersoq isumaliutigineqarsinnaavoq.